

Panggilan Tiga Malaikat untuk Berdoa

HARI 8 — KEJATUHAN BABEL DAN DOA

"Selepas segala ini, aku melihat satu lagi malaikat turun dari syurga, dengan kekuasaan besar, dan bumi diterangi oleh kemuliaannya. Dia berseru dengan suara yang lantang dan hebat, "Babel yang agung telah runtuh, telah runtuh, dan telah menjadi tempat kediaman roh-roh jahat, penjara bagi setiap roh jahat, sangkar bagi setiap burung yang jijik dan dibenci!" – Wahyu 18:1, 2 (AVB)

Perkhabaran Malaikat Kedua

Perkhabaran tiga malaikat dalam Wahyu 14 adalah dirancang secara khusus untuk mempersiapkan suatu umat bagi kedatangan Yesus. Ia menyatakan rancangan-rancangan Tuhan dan merungkai rancangan-rancangan si jahat. Perkhabaran malaikat kedua memberikan amaran yang sesungguhnya ini: "Babel telah runtuh, telah runtuh, kota yang besar itu telah memberi semua bangsa minum air anggur kemurkaan Allah terhadap pencabulan mereka" (Wahyu 14:8). Sepertimana Babel kuno berperang menentang Tuhan dalam pemberontakan terhadap perintah-perintahNya, Babel rohani berdiri dalam pemberontakan terhadap Tuhan. Ia menyebarkan di sekelilingnya "cawan air anggur" doktrin-doktrin tidak benar untuk memperdayakan jutaan orang. Ellen White menerangkan Babel seperti ini: "Dosa besar yang dituduh terhadap Babel ialah ia 'memberi semua bangsa minum air anggur kemurkaan Allah terhadap pencabulan mereka.' Cawan kemabukan ini yang ditawarkan kepada dunia melambangkan doktrin-doktrin salah yang ia telah terima sebagai hasil daripada hubungannya yang tidak benar dengan mereka yang besar dari bumi. Persahabatan dengan dunia menodai imannya dan dalamannya membuatkan ia menggunakan satu pengaruh yang rosak ke atas dunia dengan mengajarkan doktrin-doktrin yang bertentangan dengan pernyataan-pernyataan yang jelas daripada Tulisan Suci" (*The Great Controversy*, ms. 388). Percabulan adalah satu kesatuan yang terlarang. Babel rohani berpaling daripada kekasih sejati iaitu Yesus dan bersatu dengan kuasa-kuasa negara atau politik.

Kesatuan gereja dan negara ini seperti yang digambarkan di dalam Wahyu 17, membawa kepada penguatkuasaan tanda binatang itu. Babel melambangkan satu sistem keagamaan yang memutarbelitkan tulisan Alkitab dan dipusatkan pada ajaran-ajaran manusia. Perkhabaran malaikat kedua digabungkan dengan nubuatan-nubuatan Wahyu 17 dan Wahyu 18 mengungkapkan apa yang akan terjadi ke atas bumi ini sebagai satu kejutan yang sangat besar. Kuasa-kuasa keagamaan yang murtad akan bersatu dengan kekuatan politik dan ekonomi untuk membawa kesatuan pada waktu krisis dan malapetaka di seluruh dunia.

Perkhabaran malaikat kedua menyuarakan satu panggilan segera untuk berdoa sekurang-kurangnya dalam tiga perkara. Pertama, ia memanggil kita untuk menjadi setia kepada Kristus dan FirmanNya. Kompromi di dalam kehidupan peribadi kita hanya akan membawa kita untuk bersatu dengan Babel dan berperang melawan umat Tuhan pada saat-saat terakhir dalam sejarah Bumi.

Kedua, perkhabaran ini memanggil kita kepada satu iman yang dapat bertahan terhadap ujian pencobaan. Nabi Tuhan merayu kepada kita dengan sungguh-sungguh, "Satu badai sedang tiba tanpa belas kasihan dalam keberangannya. Adakah kita bersedia untuk berhadapan dengannya? Kita tidak perlu mengatakan bahawa bahaya-bahaya zaman akhir akan datang tidak lama lagi ke atas kita. Ia sebenarnya telah tiba. Kita memerlukan pedang Tuhan sekarang ini untuk menusuk dalaman jiwa dan benak yang dipenuhi dengan keinginan daging, keghairahan dan nafsu. Minda yang telah menjadi pemikiran goyah perlu untuk berubah. . . . Pemikiran mesti dipusatkan pada Tuhan" (*With God at Dawn*, ms. 113).

Ketiga, perkhabaran ini memanggil kita untuk menjemput teman dan sahabat kita ke dalam satu hubungan yang mendalam dengan Yesus dan satu pemahaman tentang kebenaran-kebenaran Wahyu bagi jam terakhir ini. Sementara kita bertelut untuk berdoa, mari kita mendoakan perkara-perkara khusus ini:

1. Suatu pemahaman yang lebih jelas tentang Firman Tuhan, suatu kasih yang lebih besar bagi Yesus dan suatu semangat yang tidak berkompromi.
2. Satu iman yang dapat bertahan terhadap ujian pencobaan.
3. Keberanian untuk bersaksi kepada mereka di sekeliling kita.

Waktu Berdoa (30-45 Minit)

Mendoakan Firman Allah – Wahyu 14:8

"Babel telah runtuh, telah runtuh, kota yang besar itu telah memberi semua bangsa minum air anggur kemurkaan Allah terhadap pencabulan mereka."

"Babel telah Runtuh"

Bapa yang kekal, selain daripada FirmanMu yang Kudus, tiada satupun di dalam dunia ini yang boleh diyakini untuk menyediakan satu dasar yang kukuh dan boleh dipercayai bagi kehidupan. Bantu kami untuk membina kehidupan kami dengan kasih kurniaMu, melalui RohMu dan FirmanMu.

"Kota yang Besar Itu Telah Memberi Semua Bangsa Minum"

Tuhan, kami berbangga untuk mengenali Engkau dan mempunyai satu pengertian tentang kebenaran melalui FirmanMu. Kami juga menyedari tanggungjawab kami disebabkan hal tersebut. Hari ini, kami berdoa bagi jutaan dan jutaan orang yang terperangkap dalam agama-agama yang tidak benar. Bantu kami untuk menunjukkan mereka kebenaran tentang siapa Engkau dan betapa Engkau mengasihi mereka dan mengingini mereka untuk datang kepada kebenaran sepenuhnya.

"Air Anggur Kemurkaan Allah terhadap Pencabulan Mereka"

Yesus, kami mengakui bahawa ada masa pandangan kami telah diganggu oleh banyak ilusi dan godaan Syaitan. Kadang-kadang, kami berhenti memandangi Engkau dan sebaliknya menumpukan kepada diri sendiri dan pengalaman yang mementingkan diri sendiri. Ampunilah kami. Lepaskan kami daripada menuruti keinginan daging dan dirikan kemenangan di dalam diri kami yang hanya Engkau mampu sediakan.

Cadangan Lanjutan Doa

Kesyukuran dan Pujian: Berikan kesyukuran bagi berkat-berkat tertentu dan puji Tuhan kerana kebaikanNya.

Pengakuan: Ambil beberapa minit untuk pengakuan peribadi dan bersyukur kepada Tuhan kerana pengampunanNya.

Bimbingan: Minta Tuhan untuk menganugerahkan kebijaksanaan bagi menghadapi cabaran dan keputusan semasa.

Gereja Kita: Berdoa bagi keperluan-keperluan gereja di peringkat wilayah dan sedunia (lihat lembaran berasingan yang berkaitan dengan permintaan).

Permintaan Setempat: Berdoa bagi keperluan-keperluan para anggota gereja, keluarga dan jiran tetangga.

Mendengar dan Menyahut: Ambil masa untuk mendengar suara Tuhan dan menyahutnya dalam pujian atau lagu.

Cadangan Lagu

SDA Hymnal: Let Your Heart Be Broken (#575); Once to Every Man and Nation (#606)

LPMI: Jam Kita Tak Tau (#93); Pulang, Pulang (#112); Pandanglah Pada Yesus (#110); Janganlah Tinggalkan Aku (#205); Maju Tendra Yesus (#152); Sorakkanlah Prang (#150)